

## U Preve a benexi

Quande emu chi de primma, all'incirca versu a meitee de Marsu, se cuminsava a sentii parlaa du Preve a benexi.

Tanti icummensaven a preparaa a cà deta recattu, levaven e tagnee, daven n'a man de caasin-a in cuxin-a, in poo de brunzin-a aa stiva, in summa, in poo pe rispettu in poo perché lea ua, bezzögnava fa in poo de puliscia.

In Campua, li in tu risö dunde stava mi, üsava che tütti i anni, quande l'ea tostu ua de benexi e donne ne daven urdine de nettezza u risö e gnatri fuenti obbedimu .

Primma de tütto rancamu a scaniggöa din te miagge, rancamu l'erba nasciüa tramezzu a e prie du caruggiu, cöggeimu tütti i papee e tütti i legnetti da destende rutti, qualche ossu da broddu cacciou da leccaa ai gatti. A lou finiu, u risö u paiva nöu , tüttu nettò e reccattou.

Oua ghea sulu d'aspetaa.

In bellu giurnu arrivava u mumentu. Doppu tantu ancö l'ea cumme festa.

Versu tre o quattro ue de pui dirnaa, arrivava u Parricu cun dui ceighetti che eiven, ün u beneitin e l'atru a cavagna pe e öve.

Tantu che vegniven in zü pe a straa, i ceighetti, treppaven tra de lu e u Parricu cun a faccia seria ma nu guei cunvintu u ghe braggiva in poo. « ste in poo brai garsunetti, a demuave g'aviei tempu duman » ma u saiva zà che avieven cuntinuou. Faven cussci tütti i anni.

A quellu mumentu ogni d'ün de gnatri sennanava a cà sö. In cà, e nostre mue, né petenaven in poo, magari cun na diaa de spüu in scia ciocca, pö se metteimu li brai a aspetaa.

« Dunde sun » ti sentivi dii da i vexin de li infaccia, « sun da i Bülli » qualchedun rispundeiva.

Scü pe a scaa, i ceighetti faven turna u mattu e se bulittigaven l'ün cun l'atru e u Parricu, turna senza arragiase « v'ò ditu de finila ! »Lu staven brai in mumentu, pö taccaven turna a treppaa.

An sertu puntu arrivaven. U Preve, primma ancun de ammiane, u ciappava u aspersorio e u cuminsava a benedii, u benediva gnatri e a cà, due preghiere e pö u fava, « ben ben cose fei ? » « Tütti ben ? » « Vostru maiù u löa » « E a salute ? »

A Mue, in poo russa a rispundeiva « pocuasse ben, sciu Arsipreve, speremmu c'è l'indüe »

E u Parricu, cun in poo de surrisu « sun cuntentu ma saieiva ancun ciü cuntentu se sé vedesscimu in poo ciü de spessu, lassciü i gexa ».

« Scia là propiu raxun, sciu Arsipreve, miemu de vegni ciü qualche otta , cose scia lö, in te n'è cà ghe tanti luei da faa che nu s'è mai finiu e aa dümennega, cun tütti a cà l'è ancun pezzu.

A questu puntu, dui franchetti in ta sacchetta, due ciappelette ai ceighetti e Preve e ceighetti zü pe a scaa, cun gnatri apröuIn cà n'arrestava, a benedisiun, due o tre stisse in tera e pè u mumentu, in poo menu cua de paggia. U Parricu u nu l'ea tantu arragiou e primma che fise n'atrannu se saiescimu missi in regula. In scia toa , ga restava, anche, qualche santin, a lettera ee famigge e na preghiera scritta. Questi papee giaven pe a cà pen poo, pö anaven a finii in ta cantia ciü erta du cummò e chi ghe ammesse ghe saian ancun oua.

A seia, se lea freidu, famu n'è baduia in ta stiva, ma a brunzin-a che gaimu detu, a brüxava mezza, na spüssa da muii. All'anava ben che alantuu dell'inquinamentu nu ne saimu ninte .